



Synfocity = 924

mail us at : mzsynfo@gmail.com; mizoramsynod@gmail.com - Phone - 2314648

February 15, 2024

❑ **Synod Hospital Chawlhbuk hawn leh hlan**

Synod Hospital Chawlhbuk (Waiting Shed) chu February 13, 2024 (Thawhlejni) khan Pathian hnenah hlan leh hawna neih a ni. He hun hi Dr. Lalthakima, Director-in a kaihrui a, chawlhbuk satu ARDECO Design & Build atangin Technical Report ngaihthlak a ni a. Chawlhbuk thar hi Rev. V.L. Luaia Hranleh, Executive Secretary i/c Hospital-in Pathian hnenah hlan hun a hmang a, Upa Lalrinmuana, Coordinator-in lawmthu sawina hun a hmang a ni.

"Synod Hospital, Durtlang hmun remchang laiah damlo kantute tan Chawlhbuk (waiting shed) Synod-in siam rawh se" tih Aizawl Hmar Presbytery rawna chu 2019 Synod Inkhawmpuiin 'a tha e' tiin, Synod Hospital Board bawh zui turin a rel a, chumi chu bawh zuiin Chawlhbuk hi ₹ 40,00,000/- senga sak a ni ta a ni.

❑ **Partnership buatsaihin Para-Church leh Pawl dang rawngbawlina kalpuite nen inhmuh khawm**

February 13, 2024 (Thawhlejni) chawhnu dar 1:00 khan Lloyd Hall, Synod Office-ah Synod Partnership Committee hmalaknain Synod recognised Para-Church Organisation-te leh Mizoram chhunga pawl dang rawngbawlina kalpuite nen inhmuh khawm a ni.

He hun hi Rev. R. Vanlalngaka, Synod Moderator-in a kaihrui a, fuihna leh thuchah Rev. Dr. K. Lallawmzuala, Executive Secretary-in a sawi a. Pawl hrang hrang aiawhte pawhin thu an sawi bawh. He inhmuh khawmnaah hian Para Church organisation leh pawl dang rawngbawlina kalpui mek 31 atangin mi 98 an kal a ni.

❑ **Lay Leaders' Training vawi 224-na**

Synod Multipurpose Training Centre (SMTC) buatsaih Lay Leaders Training vawi 224-na chu SMTC-ah February 13-16, 2024 chhung hian neih mek a ni.

Tun tum training-ah hian Presbytery panga - Kolasib, Sakawrhmutuai, Serlui, Teirei leh Tlawng Presbytery atangin Kohhran Upa 37 an tel thei a ni. February 13 (Thawhlejni) zan khan hawna inkhawm neih a ni a, Rev. H. Lalmuanchhana, SMTC Director-in programme a kaihrui a. Rev. R. Vanlalngaka, Synod Moderator-in training hawngin thuchah a sawi a, Tv. Lalramchana, Mission Veng a zai bawh.

Kohhran Upate tana Lay Leaders' Training hi kum 1996 atang khan neih tan a ni a, training-ah hian Kohhran Upate tan Kohhran enkawl dan leh inrelbawlina lam atana pawimawh chi hrang hrangte zir thin a ni a, Kohhran thlarau lam nun enkawl dan tha te zir ho thin a ni bawh.

Training kharna inkhawm hi February 16, 2024 (Zirtawpni) zan hian neih a ni ang a, Rev. V.L. Luaia Hranleh, Executive Secretary, i/c SMTC-in trainee-te hnenah Certificate semin thuchah a sawi ang a, Rev. Vanlalzuata, Resource Person-in SMTC aiawhin lawmthu a sawi ang.

❑ **Synod OM leh Burma Advocacy Group (BAG) hruaitute inkawm**

February ni 15, 2024 (Ningani) chawhma dar 11:00 khan Synod Office-ah Synod OM leh Burma Advocacy Group (BAG) hruaituten inkawm hona an nei. Inkawm honaah hian raltlante chhawmdawlina atana Mizoram Synod-in tanpuina hrang hrang a lo pek tawh avangin lawmthu an sawi bawh. Mizoram Synod hian raltlan te hnenah hian tanpuina ₹ 54,51,000/- a pe tawh a ni.

Burma Advocacy Group-te hi American Baptist Churches of USA leh US-a awm, Chin Baptist Church-te, Karen Baptist Church-te, Baptist Union of Norway-te leh an thawhpui pawl hrang hrangte an ni a, member pariat an rawn kal a ni.

❑ **Synod Mission Board**

◆ **Jharkhand Mission Field**

January 31, 2024 (Nilaini) khan Birespur Biak In chu Field Secretary-in a hawng a, Biak In hi Mission Veng Kohhranin an saksak a ni. February 11, 2024 (Pathianni) khan belthu thar panga an awm.

◆ **Arunachal & Assam Mission Field (West)**

February 9, 2024 (Zirtawpni) khan belhtu thar panga an awm.

◆ **Missionary tirh chhuah inkhawm neih a ni dawn**

February 18, 2024 (Pathianni) chawhnu dar 1:30 hian Leitan Kohhran Biak In-ah Synod Mission Board hnuai thawk tur Missionary tirh chhuah inkhawm neih a ni dawn.

Tirh chhuah inkhawm hi Synod Mission Board Secretary Rev. R. Lalhmingsangan a kaihrui ang a, Upa Lalthahluna Ralte, Coordinator, Synod Mission Board-in Missionary tirh chhuahte inhmelhriattirna a nei ang a, Rev. R. Vanlalngbaka, Synod Moderator-in tirh chhuahta hun hmangin thuchah a sawi ang a. Tirh chhuahte atangin thusawi tawi ngaihthlak a ni bawk ang. Rev. Dr. K. Lallawmzuala, Executive Secretary i/c Synod Mission Board-in tirh chhuahte tawngtaisakna hun a hmang ang. Missionary tirh chhuah turte hi mipa 12 leh hmeichhia 21, an vaiin 33 an ni.

□ **Synod Finance Committee vawi 148-na**

February 15, 2024 (Ningani) chawhma dar 10:00 khan J.M. Lloyd Hall, Synod Office-ah Synod Finance Committee vawi 148-na an thu a, member 41 an kal.

Meeting hi Synod Moderator, Rev. R. Vanlalngbaka a kaihrui a, Rev. V.L. Luaia Hranleh, Finance Officer-in report a pe. Report-ah chuan Finance Manager thar neih a nih thu te, Self Assessment Tax pek a nih thu te, Sub-Committee hmalakna te leh April 2023-January 2024 chhunga sum dinhmun te tarlan a ni. Tun tumah hian thu ngaihtuah tur pakua chhawp chhuah a ni.

□ **KTP**

February 16 (Zirtawpni) hi KTP day a ni a, Branch tam takin a lawmna hun an hmang ang. Central KTP Committee chuan hun eng emaw chen atang khan KTP Day hman dan tur ruahmanna hrang hrang hetiang hian a siam a - Biak In hung chhung hmun remchang laia KTP Flag tar, Biak In leh a vel tihfai, Veng chhung tihfai, mi harsa leh damlote tanpui, thisen pek leh a remchan anga KTP thil tum leh thupui zir ho tih te an ni a, heng bakah hian branch-in mahni remchan dan angin an hmang thin bawk.

KTP din theihna tura hma latu, Provisional Committee-in Synod Standing Committee-ah KTP din an dil a, Synod Standing Committee chuan kum 1954 February 16 khan a pawm a, Synod Standing Committee-in KTP a pawm ni hi KTP din hunah pawm a ni ta a, KTP a din atanga an Committee hmasak ber hun hi February 22, 1954 a ni.

KTP inchhiarna hnuhung bera a lan danin tun dinhmunah branch 898 awmin member 1,65,089 (mipa 1,01,742 leh hmeichhia 63,347) an awm a ni.

□ **Mizoram Christian College (MCC)**

◆ Mizoram University chuan February 6, 2024 (Thawhlehi) khan New Education Policy (NEP) 2020 hman a nih hnu Under Graduate results hmasa ber Odd Semester 2023, 1st Semester Regular results a tichhuak a, Mizoram Christian College pawhin result tha tak a nei a, Bachelor of Arts (BA) 82.43% leh Bachelor of Commerce (B.Com) 95.65% in an passed a ni.

Pass Percentage atanga chhutin BA results bikah hian Mizoram-a College hrang hrang 25 zingah MCC hi Pahnihna a ni a, B.Com results-ah hian Commerce Stream nei College pariat zingah Pakhatna a ni bawk. Heng bakah hian NEP 2020-in a huam ve tak loh 3rd Semester leh 5th Semester BA leh B.Com bakah BBA results chhuakah MCC atanga Streams hrang hranga Pass Percentage neih dan chu hetiang hi a ni - Arts : 78.56%, Commerce : 88.24%, Management : 70.61%

◆ **Most Progressive Award hlan**

Mizoram Christian College atanga Graduate hmasa berte zinga mi pathumte chu Aizawl Theological College-ah Bachelor of Divinity (BD) zir tura thlan an ni a. Hemi lawmpui nan hian February 12, 2024 (Thawhtanni) khan MCC Devotion hunah 'Most Progressive Award' hlan an ni a, pawisa fai ₹ 2,000/- pek an ni. Chung mi pathumte chu:

1. Timothy Lalruatfela S/o Rev. Dr. Vanlalhlana (L), Ramhlun South
2. Vanrohlua S/o Francis Malsawmdawnga, Kulikawn West
3. Malsawmdawngkima S/o C. Laltlanliana, Lungpho

□ **Trust**

February 13, 2024 (Thawhlehi) khan Buhchangphai Bial leh Tumpui Bial Pastor Quarters ram tur en felin Upa Thangliankhuma, A.E leh Pu Lalramenga Royte, J.E te an kal.

- ❑ **Kohhran Hmeichhia**
February 16-18, 2024 chung hian Lungsenah Mizoram Baptist Kohhran Hmeichhe Inkhawmpui hmanpuiin Pi Zothanpari, Chairman leh Pi Lamchhingi, committee member te an kal ang.
- ❑ **Finance**
February 16, 2024 (Zirtawpni) zan hian ITI Veng Kohhranah Accounts Training neihpui turin Upa Lalrosanga Kawlni leh T. Upa R. Lalbiakdika te an kal ang.
- ❑ **MSSU**
February 17, 2024 (Inrinni) hian Sunday School Zirtirtu training neihpui turin Trainer te hetiang hian an chhuak ang:
Lungpho Bial - Upa B. Lalhmunliana leh Upa B. Hmingthanruala
Suarhliap Bial - Upa K. Zoremsanga leh Upa Lalsiammawia Pachuau
New Capital Complex Kohhran - Upa Hrilthansanga, Upa Zohmangaiha leh Upa John Lalnunthara
Tlangnuam South Kohhran - Upa Lalthanchhunga, Upa Lalchuilova leh T. Upa Dr. H.P. Lalropuia
- ❑ **Synod Relief Fund**
Tun hnaia harsatna hrang hrang tawkte hnenah Synod Relief Fund atangin hetiang hian chhawmdawlina pek a ni.
- | S.No | Khua/Veng | Pek chhan | Chhungkaw zat | Pek zat |
|------|----------------|-----------|-------------------|-------------------|
| 1. | Zawngin | Damlo | 1 | ₹ 10,000/- |
| 2. | Bunghmun North | Damlo | 1 | ₹ 10,000/- |
| | | | Belh khawm | ₹ 20,000/- |
- January thla chhunga harsatna hrang hrang tawkte hnena Synod Relief Fund atanga chhawmdawlina sem zat chu ₹ 2,70,000/- a ni.
- ❑ **FM Zoawi - Aizawl & Lunglei : Hruaina Eng Radio Programme**
February 16, 2024 (Zirtawpni) @ 7:30 p.m. :
Solo : H. Lalremruati (Maruati) - Tawngtaina
Zaipawl : Mizoram Synod Choir - Zin kawng tha ber
Thusawi : Upa Dr. Lalrintluanga - Zirna
Solo : C. Vanlalroluhtumi (Tumtumi) - Lungpui nghet
Zaipawl : Thingdawl Bial Zaipawl - Lalpa remruat
- ❑ **Su Samachar Prasaran Programme :**
February 18, 2024 (Pathianni) 5:30 pm. :
Group/Choir/Solo : Lunglei Area Masihi Sangati - Yisu lio tera nam
Group/Choir/Solo : Champhai Vengthlang Pastor Bial Masihi Sangati - Hamara Kal
Sermon : Rev. Jimmy Malsawmdawngliana
Group/Choir/Solo : Lalduhawma - Mere Gunah
Group/Choir/Solo : The Leprosy Mission Choir - Ham Soup Te He
- ❑ **Hruaina Eng TV Programme**
15.2.2024 (Ningani) 8:30 pm : Thupui Zir bing : Hun hnunhng thu - Mithianghlim lawr
16.2.2024 (Zirtawpni) 5:00 pm : Kristian Naupang Pual
17.2.2024 (Inrinni) 5:30 pm : Puitling Sunday School Zirlai
18.2.2024 (Pathianni) 8:00 am : Weekly round up
5:30 pm : Su Samachar Prasaran
19.2.2024 (Thawhtanni) 8:30 pm : Hruaina Eng Luang chhuak
- ❑ **Moderator leh Executive Secretary-te Programme:**
Rev. R. Vanlalnghaka : Moderator
February 18, 2024 Missionary tirh chhuah inkhawm - Leitan Kohhran
Rev. C. Zoramawia : Senior Executive Secretary
February 12-14, 2024 Finance programme - Kolkatta
Rev. V.L. Luaia Hranleh : Executive Secretary
February 14, 2024 Central Kohhran Hmeichhe Committee

Rev. Dr. K. Lallawmzuala : Executive Secretary

February 18, 2024

Missionary tirh chhuah inkhawm - Leitan Kohhran

February ni 20-22 chhunga Synod Executive Committee (SEC) leh ni 23-a Synod Service Board-ah Moderator leh Executive Secretary-te an þhu ang.

PATHIAN THU ZIR DUH TAN

Presbyterian Bible School, Mission Veng-ah Certificate in Theology (C.Th) Admission hawn a ni a. Dil duhte tan a hnuai tarlan hi hriat tur a ni e.

Admission Form	:	Office hun chhungin ₹ 10/- a lei theih a ni
Dil hun chhung	:	April 26, 2024 (Zirtawpni) tlai dar 3:00 thleng
Dil thei chin	:	Class VII pass, kum 16 chin, Kohhran dan chhunga awm
Interview	:	April 30, 2024 (Thawhlehi) chawhma dar 10:00
Class ñan hun	:	May 6, 2024 (Thawhñanni)
Zir hun chhung	:	May - August, 2024

Hrechiang duh tan Phone No. **8974613378/8296035491/9612174790**-ah zawhfiah theih a ni.

Sd/-

Rev. Lalrinsanga
Principal

Presbyterian Bible School

SIKULPUI (Mizo Medium, Mipa Sikul) NEW ADMISSION 2024 -2025

Pawl 1-7 Admission Form lak chhuah theih hun February 27-March 5, 2024 (10:00 am – 2:00 pm)

Sd/-

Headmaster
Sikulpui

9436152024/7085256477

SYNOD BOOKROOM LEKHABU CHHUAQ THAR - FEBRUARY, 2024

1. Presbyterian Handbook Revised Edition 2023:	₹ 100/-
2. Nitin Thlarau Chaw:	₹ 200/-
3. Albert Malsawmdawngliana Sermon-te: <i>Upa C. Chawngnuna</i>	₹ 150/-
4. Pathian Thu Sermon Sawmthum: <i>Upa R. Zatlai</i>	₹ 150/-
5. I Nihna Hruaitu: <i>Dr. Vanlalsiama Chhangte</i>	₹ 250/-
6. Ka Khualzin Kawng Leh Hmachhuan Ram: <i>Rev. B. Ropianga</i>	₹ 150/-
7. I Thu Ber Lo: <i>Dr. C. Lalhrekima</i>	₹ 350/-
8. Hlawhtlinna Thuruk: <i>V.L. Zaikima</i>	₹ 200/-
9. Raltiang Rimawi: <i>Lalhruaitluanga Chawngte</i>	₹ 310/-
10. Pu M. Suaka Durtlang Lal Chanchin: <i>M. Suaka thlahte</i>	₹ 300/-
11. Japanese-English-Mizo Translation: <i>R. Saikhuma leh Kouichi Ishiyama</i>	₹ 150/-
12. Imphal Mizote: <i>C. Chawngnuna</i>	₹ 300/-
13. Relthang Ka Dawn Zo Lo: <i>Captain L.Z Sailo</i>	₹ 200/-